

OREN A L'ERA CARATTERISTICH ANCA PER I SOO BEI CASSINN

Disem la verità, c'è l'è semper staa caratteristich al nost Oren con i soo caa vècc ma original, che bellezza poo certi cassinn, invece adèss a continuen a fabbricà condomini e tanti villètt vuna differenta dell'altra con ona stile minga nanca perfètt,

meno mal che tutt i fabbricà a hin staa tirà suu fouera paes sedenò a l'era un'arlecchinata e tanto offensiva per l'Orenes anca perchè a g'è tegnum a lassala comme a l'è la caa paterna a guai a chi saa intromett per fann vuna pussee moderna

però, hann riescii a sgiaccà giù la cort dal Vadan e quella di Mirei ma finalmente è intervenuu le Belle Arti per far rispettà i noster idej e difatti è passà tanto temp ma, fina adess, hann toccà puu nient: a saa podeva immaginas che a consciaven on paes da paiasc.

A gh'è anca ona quei cassina chi, che puu nissun al vor staa lì, comèe la Palazzina, la Rampina, quella di Pom, al Zapon e al Pignon, saurii, è mort i vegg, la noeuva generazion hann pientà lì cont reson on poo, a lassaven la sua abitazion solament per faa certi comission

e saa vestivan da precètt per andà hin gesa, funerali e sposalizi però, bisogna riconos c'è eran brava gent, lavorador e senza vizii, anca mi a gh'è la faria noo da viv hin di cassinn hin mezz al terren: forse bisogna nass hin sul post per pudèe viv ben e anca seren.

Mi a godi on mond quant a vedi sti donnett a brasett ai soo omett c'è vegnan foeura da la porta cont hin man la sua bella scorta e giren a faa la spesa hin Oren per pudèe passeggià on momentin oppur per ciappà ona boccada d'aria sana, propri quella a la paesana

i daa pensà che la strada ona volta a l'era minga nanca asfaltada ma risciada cont i sass e a camminà a ta fasevat tanto frecass anca perchè, specialment i bagaiott, a mettevan suu di bei sucurott: se poo a ta fasevat on quei topich, a ta sceppavet al barbelott.

A chi temp làa, pussee che al casular, ha la lavorava tanto al sucuree, a gh'era Ramualdo o Ersilio, che per fai o impatai, a g'ava stavan noo adree anca perchè i scarp a saa mettevàn suu solament hin certi occasion specialment quanti a gh'era d'andà adree a la nostra procession

ma appena c'ava saa finiva, bisognava andà a tirai foeura subito a caa, quasi semper a see andava a pebiot tutt sbrindelà e cont suu nigut ma ogni tant on quei pee al see sbusava e hin d'on bott al saa medicava: tutt i bagaètt e tusanett hin dal giugà a sfilavan i sucurett e i calzètt,

anca mi a giravi per al paes on poo spericulà ma senza pretes eppur a son mai staa ammalà, forse perchè a s'eri inscì abituà; d'inverno poo a see andava hin lècc cont la stanza pien da frecc ma adèss a l'è ona pacchia, a gh'è i riscaldament hin di appartement

a gh'era sii ona bella coperta pesanta o la prepunta e al prepontin e a see faseva anca la boll, specialment per i vègg e al pussee piscinin al gh'era noo al metano, ma ona stua per pudèe scaldà ogni canton e a la funzionava cont i melgasc galoo legn e, saa gh'era, al carbon.

Hin qualsiasi caa, sia da l'operari che hin da quella dal contadin a gh'era on bell camin e a se faseva da mangià hin del pignatin a girava tanti lugher, e ona quei vuna a l'andava hin dal pignatin ma la regiura a la cercava da rugala suu per non fa la vedèe puu,

a s'erum bon da bocca e a slappavum tutt quel c'ava truavum e senza brontolà, perchè a l'era facil restà senza mangià, invece adèss a saa dev faa tuscòs a puntino e suu ordinazion e quest al dimostra ch'han ciappà caa sua comèe ona pension.

La colpa a l'è anca nostra e a semm bon noo de fass rispettà ma cont certi crapp d'incoeu a saa poo propi minga fai ragionà, disem c'ava hin bon solament da comandà cont ona padronanza ma al progress a la sviluppà l'egoismo, baldanza e tanta ignoranza. Quindi a gh'ava vor tanta bona volontà per pudèe combatt la stupidità.